

## **Стихиры Успения на «Господи, воззвах», глас 1:**

**Да будут уши Твои // внимлюще гласу моления моего.**

Повторяем 1-ю стихиру

**Аще беззакония назриши, Господи, Господи, кто постоит?  
/ /Яко у Тебе очищение есть.**

Дивны Твоя тайны, Богородице: / Вышняго престол явилася еси, Владычице, / и от земли к Небеси преставилася еси днесь. / Слава Твоя боголепная, / богоподобными сияющи чудесы. / Девы с Материю Царевою, / на высоту вознеситесь. / Благодатная, радуйся, с Тобою Господь, // подай миру Тобою велию милость.

**Имене ради Твоего потерпех Тя, Господи, потерпе душа моя в слово Твое, // упова душа моя на Господа.**

Твое славят успение / Власти и Престоли, / Начала и Господства, / Силы и Херувими и страшнии Серафими, / радуются земнороднии, / о Божественней Твоей славе красящися, / припадают людие со Архангелы и Ангелы и воспевают: / Благодатная, радуйся, с Тобою Господь, // подай миру Тобою велию милость.

**Слава, и ныне, глас 1:**

Богоначальным мановением, / отвсюду Богоноснии апостоли, / облаки висоце взимаеми, / дошедше пречистаго и живоначальнаго Твоего тела, / любезно лобызаху. / Превышния же Небесныя силы, / со своим Владыкою пришедше, / богоприятное и пречистое тело предсылающе, / ужасом одержими; / прекрасно же предыдяху / и невидимо вопияху превышним чиноначалием: / се Всецарица Богоотроковица прииде. / Возьмите врата и Сию премирно подымите, / Присносущнаго Матерь Света, / Тоя бо ради всеродное человеком спасение бысть. / На Нюже взирати не можем, / и Той достойную честь воздати немощно: / Тоя бо преизящное преходит всяк ум. / Темже, Пречистая Богородице, / присно с Живоносным Царем и Рождеством живущи, / молися выну сохранить и спасти / от всякаго прилога противнаго / новыя люди Твоя: / Твое бо предстательство стяжахом, // во веки светоявленно блажаще.